

[FOTO MAHZIR MAT ISA /BH]

→ ANUGERAH

Galak rakyat berbakti kepada negara

Kuala Lumpur: Anugerah Merdeka adalah inisiatif yang baik kerana mengiktiraf individu yang menyumbang kepada pembangunan negara.

Sejarawan, Prof Emeritus Tan Sri Dr Khoo Kay Kim, yang menerima anugerah itu bagi kategori pencapaian akademik luar biasa, berkata ia juga menggalakkan rakyat menyumbang bakti kepada negara bangsa.

Bagaimanapun, beliau yang juga antara individu bertanggungjawab merangka Rukun Negara, bimbang dengan golongan muda yang hanya menumpukan pada diri sendiri berbanding memahami perjuangan negara bangsa, selain tidak memahami Rukun Negara.

"Mereka diajar Rukun Negara untuk dihafal. Contohnya keluhuran Perlembagaan, bila saya tanya apa makna Perlembagaan, mereka tak tahu. Tak boleh begitu.

"Semua kena dijelaskan kepada generasi muda. Mereka tak tahu betapa hebatnya negara ini suatu ketika dahulu.

Kumpul tulisan warga asing

"Sebab itu sekarang saya sedang mengumpul semua tulisan oleh warga asing yang memuji Malaysia, supaya mereka boleh membacanya dan memiliki pandangan berbeza terhadap negara ini," katanya ditemui selepas Majlis Penyampaian Anugerah Merdeka 2018 di sini, semalam.

Sementara itu, 'Bapa Animasi Negara', Hassan Abdul Muthalib, berkata beliau tidak menyangka sumbangannya dalam bidang itu membolehkannya menerima anugerah berkenaan bagi kategori pendidikan dan komuniti.

"Dalam bidang filem, multimedia atau animasi, perkara paling penting adalah jalan cerita, dan memerlukan pengarah yang bijak menggunakan teknik secara naratif.

"Teknik boleh dipelajari, tetapi keupayaan menghasilkan naratif yang menarik hanya dapat diperoleh menerusi pengalaman, pemerhatian, mengembara dan selalu bercampur dengan orang yang lebih pandai daripada kita," katanya.

Sultan Nazrin Muizzuddin Shah bersama penerima Anugerah, Merdeka 2018 (dari kiri) Ee Kiang, R Rajah, Kay Kim, Eavis, Mohd Hair, Hassan dan Gurmit Singh.

7 terima Anugerah Merdeka

→ Pemenang dipilih ikut lima kategori

Oleh Ahmad Suhael Adnan dan Suzanna Pillay
cnews@nstp.com.my

► Kuala Lumpur

Tujuh pakar yang merekodkan pencapaian luar biasa dalam bidang pengkhususan masing-masing menerima Anugerah Merdeka 2018 anjuran PETRONAS, ExxonMobil serta Shell, di sini, semalam.

Mereka ialah Bapa Animasi Negara, Hassan Abdul Muthalib; aktivis alam sekitar, Gurmit Singh KS; Canselor Universiti Perubatan Antarabangsa (IMU), Prof Dr Gan Ee Kiang; Dekan Fakulti Perubatan Veterinar Universiti Putra Malaysia (UPM), Prof Dr Mohd Hair Bejo.

Selain itu, sejarawan, Prof Emeritus Tan Sri Dr Khoo Kay Kim; Pakar Ekonomi Universiti Malaya (UM), Prof Kehormat Dr R Rajah dan pakar speleologi

British, Andrew James Eavis.

Mereka dikurniakan anugerah mengikut lima kategori, iaitu pendidikan dan komuniti, alam sekitar, kesihatan, sains dan teknologi (dua penerima bersama), pencapaian akademik luar biasa (dua penerima bersama) dan sumbangan luar biasa kepada rakyat Malaysia.

Dicatat dalam sejarah

Setiap pemenang menerima trofi Anugerah Merdeka berserta sijil dan wang tunai, selain diberi penghormatan untuk dicatat dalam sejarah negara bersama 42 individu dan dua organisasi yang pernah menerima anugerah berkenaan sebelum ini.

Terdahulu, Sultan Perak, Sultan Nazrin Muizzuddin Shah, selaku Penaung Diraja Lembaga Pemegang Amanah Anugerah Merdeka berkenaan menyampaikan anugerah itu kepada semua pemenang.

Yang turut berangkat, Raja Permaisuri Perak, Tuanku Zara Salim.

Yang turut hadir, Pengerusi PETRONAS, Datuk Ahmad Nizam Salleh; Presiden dan Ketua Pegawai Eksekutif Kumpulan

PETRONAS, Tan Sri Wan Zul-kiflee Wan Ariffin; Presiden Penerokaan dan Pengeluaran ExxonMobil Malaysia Inc, Edward E Graham dan Pengerusi Shell Malaysia, Datuk Iain Lo.

Hassan menerima anugerah bagi kategori pendidikan dan komuniti atas sumbangannya sebagai peneraju industri animasi tempatan, selain peranannya dalam mewujudkan kerangka pendidikan kepentingan artistik animasi di negara ini.

Kategori alam sekitar

Kategori alam sekitar dianugerahkan kepada Gurmit atas sumbangan aktivisme, kerja advokasi serta peranan dalam memperjuangkan kelestarian alam sekitar serta menentang perubahan iklim di Malaysia.

Kiang yang menerima anugerah bagi kategori kesihatan, sains dan teknologi, adalah peneraju dalam membangunkan model komersial penyelidikan dan pembangunan (R&D) di universiti negara ini, selain peranannya dalam bidang farmakologi klinikal, sains farmasetikal dan penyelidikan perubatan.

Yang turut menerima anugerah kategori sama adalah Mohd Hair atas peranannya dalam penghasilan makanan yang lestari menerusi pembangunan dan pengkomersialan vaksin terhadap penyakit Gumboro yang menyerang ayam, sekaligus memanfaatkan industri berkenaan di Malaysia dan antarabangsa.

Anugerah bagi kategori pencapaian akademik luar biasa diberikan kepada Kay Kim yang bertanggungjawab dalam kajian serta penterjemahan semula sejarah Malaysia, selain dedikasi seumur hidupnya dalam pendidikan sejarah.

Kategori sama turut dianugerahkan kepada Rajah hasil kajian dan pembangunan kerangka teori makroekonomi dengan meneraju konsep, pengukuran dan aplikasi teori inovasi, serta merangka dasar inovasi negara membangun.

Eavis pula menerima anugerah kategori sumbangan luar biasa kepada rakyat Malaysia, atas kajian dan pembabitannya dalam Projek Gua Mulu bersama Ekspedisi Persatuan Geografi Diraja, selain penemuan lohong gua terbesar dunia, Sarawak Chamber.